

Falù

di Ybbsitz

personaçs:

Falù, pipin frut di 9 agns

Pavee, Marsalis Venerosa Rosse, clamade Rosse

Besteute

Babau cu la lenghe zale

Toff, pipin grant di 40 agns, Espert naturalistic, cu la barbe

Lûc: une splaze dongje dal mâr, podarès iessi la Grece, la Turchie o Cipro.

sene 1

insom si viôt il mâr in tampieste. Tal mieç di chel pastiel e je une barcjute, plene di int. La barcjute a va e ven sot da lis ondis, cum simpri mancûl int dentri. Po no si rive a viodi nancje la barcjute, dome mâr scûr e trist. Ae fin no si viôt nancje il mâr. Lûs denant

sene 2

Al je un taulin, e je la sene primarie. Parsore di chest taulin e une come un splaze, savalon, e parsore al je un piçul pipin, ca si clame Falù, distirât. Te posizion al somee il piçul frut sirian Aylan, inneât a Bodrum tal 2015. Falù no si mûf, l'atôr ai frache la panze, al ven fûr un spissulot di aghe. Falù al dîs alc, un lament, al scomence a movi lis gjambis, i braçs. Al sberle

FALÙ Papà!

L'atôr lu lasse stâ, al fâs moto ca nol è lui il papà, nol jentre. Falù si alce sui braçs, plen di ingomut al spude fûr aghe, al cole jù par tiere, distirât compagn che prin. L'atôr ancjemò ai frache la panze, al ven fûr un spissulot di aghe. Falù al vierç i voi, al palpe dulà cal je, al si met sentât, al tire la bende ca je peade al pols, la bende si tire, si involuce, a rive ae fin, nol je nuie tacât. Falù al salte in pîs, al sberle ancjemò plui fuart

FALÙ Papà! Papà!

Nissun nol rispuint. Il pipin si cjale ator, al tire flât a grops. Al cîr ator, al cjale, al clame ancjemò

sene 3

Falù al cjape la bende, a fâs sù e la tire tal mieç dal mâr, come cal veti di pescjâ. La tire plui lontan cal rive, a la cerçe come ca si fâs cul fîl di pescje, al tire, nol cjape nuie, al torne a fâ dutis lis mossis, ancjemò, podopo al met il fîl par tiere, al va a pissâ

sene 4

al torne, plen di sêt, al prove a bevi la aghe dal mâr, la spude, al vai, si inrabie, al torne a cjapà sù la bende, al prove a tirâle tal mâr ma a si imberdee di bessôl e al cole par tiere

sene 5

si sint riduçâ. E je une pavee, dute rosse, ca si è metude a ridi.

ROSSE Hi hi hi

Falù la cjale

ROSSE Hi hi hi, âstu batût il cûl e glotude la lenghe? Hi hi hi!

Falù si met in pîs, si nete dal polvar, al met a puest la bende, par chel cal rive, la pavee a riduçe ancjemò alore Falù ai fâs une bocjate, la pavee ai mostre il cûl, Falù le cjale impressionât

FALÙ Dute rosse ancje daûr, une pavee Marsalis dute rosse!

ROSSE (dute braurose) Marsalis Venerosa, rosse, ancje daûr

Rosse a mene il cûl

FALÙ no ti vevi mai viodude, dongje, vive... dome ta lis fotos dai libris

la pavee si fâs cjalâ denant e daûr

FALÙ sêso dutis rossis achì?

ROSSE po sì po. Dutis. Ancje me mari, ancje i miei fiis a saran ducj ros

Falù si cjale lis mans

FALÙ ce gole di iessi dut ros ancje jo

ROSSE cussì tu podaressis someà gno fi

Falù al rît

ROSSE spiete che o fâs la mame: âstu frêt? Âstu mangjât?

Falù si imberdee cu la bende

ROSSE tu no tu sês di chestis bandis

FALÙ soi rivât cul gomon. Jo, gno pari e altre int

Falù al cîr di fâ sù la bende par tirâle

ROSSE ce ciristu di pescjâ?

FALÙ gno pari

ROSSE ma to pari nol pues jessi tal mieç dal mâr! impussibil

FALÙ cjale di adalt par plasê

ROSSE ma jo no cognos to pari

FALÙ cjale me, gno pari a l'è compagn di me

la pavee a fâs juste moto di cjalâ

ROSSE to pari al sarà cuissà dulà. Il mâr al puarte achì, al puarte par là. Cumò cuietiti, ven achì cun me, spietarin insiemit to pari, ancje par une setemane.

FALÙ une setemane a l'è tant

ROSSE une setemane e je une vite interie, eh, presentînsi

FALÙ Falù

ROSSE Rosse

FALÙ Rosse, la Marsalis Venerosa Rosse

ROSSE ce ben che tu tabais, Palù

FALÙ mi clami Falù, cu la F

ROSSE come femine!

FALÙ Tu sêstu mascjo o femine?

ROSSE femine. Dutis lis paveis a son feminis! Vustu che ti fasi di mame, Palù? O soi vecje di doi diis, soi femine, tu sês di bessol e picinin, ti fâs di mame!

FALÙ Ce isal di mangjâ a cjase to?

ROSSE rosis e tavans, pudiesis, svuarbecjavai, besteutis insome!

FALÙ Ce porcarie!

ROSSE ma ce? Al je il vêr momon!

FALÙ no jo

ROSSE parcè po?

FALÙ i viaç si fasin cul papà, la mame a reste a cjase

ROSSE Cjale che jo o vîf une setemane, tu puedis tornâ indaûr cuant che tu vûs, jo ti ten, sâstu?

Falù nol tabae, al va. La pavee e reste di bessole

ROSSE dai, torne! Ven chi!! Farù! Farù! Ce ninin cal je

sene 6

Falù al cjate alc di mangjâ, al mangje, al bêf. Cussì a va miôr. Si sint come une musicute, un cjantâ picinin. E je une besteute ca cîr di tirâ jù coculis dal arbul. A salte, a cjante, e no rive a brincâ lis coculis. Alore a torne jù, a salte ancjemò, acrobatiche, ma no si capîs ben se ce ca voie di fâ al je cjapâ lis coculis o fâ salts mortâi. Falù si fâs viodi, la besteute a scjampe subit. Falù al salte ancje lui, al cjante ancje lui. La besteute a torne, a saltin insiemit, a cjapin la cocule. Falù al cjante e al bale, la besteute ancje

FALÙ velu là! Siôrs e sioriis, il plu bulo di ducj!!!! mister...

Falù al dâ la peraule ae besteute, ca no dîs nuie, lu cjale, contente

FALÙ mi clami Falù! Falù, cu la efe

la besteute e reste contente, no dîs nuie, Falù ai dâ la cocule, che la met vie e torne

FALÙ amîs. Par simpri

Falù al cjape la bende de sachete e la consegne ae besteute. La besteute a cjale la bende

FALÙ e je une cuarde, tu la peis cussì no si pierdìn, cjape chi!

La besteute a cjape la bende e la met vie compagn che la cocule

FALÙ Ti peistu dopo? Ok, no problem! Scolte, gno amì...

Falù si distire par tiere, al va dongje la besteute

FALÙ mi fâstu ancje di papà? Restìn insiemit!

La besteute no fâs moto di nuie, a cjale l'arbul, a cjale Falù, par un moment al je dut cidin, Falù nol je content

FALÙ Alore? Âstu capît o no? Sêstu insemenît?

Falù al alce la vôs, masse par la besteute ca scjampe te tane

FALÙ Scjampe, scjampe, pedoli! Tu sês masse piçul! un papà al scugne jessi plui grant che il fi! Se no cemût lu cjape in braç? Tu tu rivis dome a fâmi ghitiis!

La besteute no à gole di tornâ, Falù al tire une pidade a l'arbul, forsit ai cole une cocule tal cjâf, al va vie ancje lui

sene 7

a torne ROSSE

ROSSE ce bulo di domandâ a chê besteute di fâsi di papà! E jo? Parcè no mi vustu come mame?

FALÙ jo no soi ros, tu no tu mi someis!

ROSSE ma cui si free dal colôr!

FALÙ tu tu rivis juste a fami ghitiis cu lis alutis

ROSSE Anin a cjase me! Su po, anin... no par culî! Ocjo! e je la Tiere dal Babau!

FALÙ magari gno pari a l'è culî! cjale di adalt par plasê!

ROSSE su po supo, impussibil, lu varessin crustât di brut! Anin a cjase, picinin, anin e tu passarâs une bieliscime setemane, cence Babau

FALÙ tu tu âs pôre dal Babau! Lis feminis e an simpri pôre

Falù al va indevant di bessôl, cence pôre, al jentre te Tiere dal Babau

ROSSE no stâ a lâ! Ti crustaran ancje te!

la pavee a reste di bessole

sene 8

La pavee a cjante e bale la naine dal Uf, Uf!

ROSSE Uf! Uf! Picinin torne achî, picinin anin a cjase! Cumò ti cjaparan, cumò ti crustaran, no tu tornarâs, no viodarai plui, Tarù! Uf! Uf! Scoltimi, orelis stropadis! Cjalimi, voi vuarp! Scolte la to mame, Tarù! Uf! Uf! Il Babau ti cjaparà! Ti cjaparà! Tarù! Uf! Uf!

sene 9

Falù al je dretni la Tiere dal Babau. Cumò al je plen di pôre, però. A si sint un lament di lontan, Falù si tapone. Al je un Babau grant e grues, cu la lenghe zâle, impresonât te une palisse. La palisse e je impiade, une lusute rosse, un cric impiât. Il Babau al cîr di fracâ il cric, ma nol rive. Al blesteme, al vai. Falù al fâs un rumôr, il Babau lu sint

BABAU sêso rivâts! Sêso vignûts a cjoimi! Maledets, jo o mûr ma ancje vualtris se mi mangiais! No voi, no voi, lait vie! braconîrs! Popul maledet, cjaçadôrs, lassaitmi stâ

Falù no si fâs viodi

FALÛ jo no soi migo un cjaçadôr

BABAU no?! Judimi alore, iudimi, dai, frut, picinin, soi culî par sbalio, jo soi bon, ven ven fantat, ven , frache chel boton, iudimi, dai

Falù al si fâs viodi, nol je lontan dal cric

FALÛ Crustitu?

BABAU Ma no ! O mangji dome robis zalis, limons, bananis, pierçui, cjale! *(al fâs viodi la lenghe zâle)* soi vegjetarian, iudimi, dai, jo no crusti!

Il Babau al mostre ce cal rive a fâ cu la so bocje e lenghe, Falù si spaurîs, il babau al si nacuarç

BABAU iudimi ninin, lassimi lâ libar, frache chel boton, stoi par murî, iudimi...

Falù al glot la pôre, a zuin un pôc insiemit, un al fâs, chel altri al fâs compagn

FALÛ mi fâstu di papà se o frachi il boton?

BABAU di passà? Âstu di passà? Po sì po! Nol è nissun fastidi!

FALÛ no ti crôt

BABAU nissun mi crôt, a me, e e an reson, ma nissun ti crodarà a te, cuant che tu saras tu cjapât te vuote, ti ridaran in muse

a zuin ancjemò. Podopo il Babau al met in sene la sô muart: al sofle, al sburte, al vai, podopo dut dût si sfante par tiere. Falù al cjale fis, nol capîs. Si svicine, lu tocje, nuie. Il Babau al reste dut dût. Alore Falù si svicine al cric, al cjale il Babau, nuie, nissun moto, Falù al frache il cric, il Babau si svee e al scomence a saltâ e al si libere.

BABAU AH AH!! libar! O soi libar!!!!

FALÛ cumò fami di papà

Falù al cjoî la bende, le dâ al babau ca si sta cjalant il cuarp. Il Babau cence fastidi al mangje subit la bende, al à un ingomut, al spude fûr la bende

BABAU ce porcarie

il Babau al salte intor di Falù, cal scjampe

FALÙ i papà no mangjin i fiis!

BABAU jo no soi migo to pari

FALÙ io ti ai liberât, cumò mi fâstu di papà?

il Babau si svicine a Falù

BABAU vierç che bocje! Tu no tu âs la lenghe zâle

FALÙ ma cui si free dal colôr!

Lu nâse

BABAU tu no tu pucis di bon! No no no no no! Jo no soi to papà! Tu no tu mi sameis

Falù al sbasse il cjâf, al tache a vaî

BABAU ce spurghistu?

Il Babau ai leche la muse

BABAU Puah! Ce schifo, a sa di sâl

al spude dulintor

BABAU dome par vie che o soi cussì bon no ti crusti, picinin. Ti è lade ben

Il Babau si slontane, Falù al cjape la bende, la nete, al torne a passâ il confin da la Tiere dal Babau

sene 10

Rosse e jere daûr a spietâlu, Falù ai va dongje

ROSSE tu tu âs vaiût! E an crustât to pari? Picinin, picinin! Ven achì. Jo o campi e setemane interie, e ti promet che no tu vaiarâs plui

Falù al scolte, la pavee e je simpri plui esaltade de sôs peraulis

ROSSE Se tu mi ubidissis ti puartarai ator pe isule, par une setemane interie tu mangjarâs rosis e besteutis, tu impararâs la lenghe des paveis, ti cjararai che tu polsis, fasarìn gulizion e i compits di scuele

FALÙ no, i compits no!

ROSSE ancje chei. A l'è biel studiâ e imparâ cui compits

FALÙ no, no! E lis besteutis mai
 ROSSE sì, compits e besteutis
 FALÙ no!
 ROSSE sì sì sì
 FALÙ no! Tu sês come dutis lis maris! Dome rompi i tabars!
 ROSSE cumò ti cjoì une besteute
 FALÙ bleah ce schifo! No ai voie di mangjà besteutis!
 ROSSE tu sês dome viziât e plen di malegracie
 FALÙ e tu tu sês dome une paveute rosse! No tu podis iessi me mari, Jo no soi ros! I colôrs
 a son impuartants! E no tu pucis di bon! Tu tu mangjis besteutis! E po,dopo cheste
 setemane, ce fasio?!

ROSSE ma une setemane e je une vite interie! Passe chi!

FALÙ no!

sene 11

*intant ca son daûr a cuistionâ, al rive Toff, espert naturalistic, un pipin un pôc plui grant, cuntune
 vuate in man. Planc plancut al rive dongje e dibot al cjape la pavee te vuate, ai sborfe intor une
 sostance ca la bloche, la pavee e je come muarte.*

TOFF cjapade! Cjapade! Vive! Cjapade cjapade eeee!!!!

FALÙ eco! Cussì tu imparis, a rompi i tabars! Cjapade!

TOFF frutin, cuietiti, le ai cjapade jo

FALÙ cence copâle, vere?

TOFF sêstu mat? Mai copâlis, dome indurmidîlis

l'espert naturalistic al cjale la pavee

TOFF cjale chi. Agns passâts a cjâlâ fotografiis, e cumò le ai culì, une
 Marsalis, e ancjemò dute rosse! Ancje daûr e je rosse! Grasie picinin, grasie ancje a
 ti!!!!

A fasin un bal insiemit, po l'espert naturalistic plen di gracie al met la pavee te une scjate

FALÙ Marsalis Venerosa rosse, dute rosse

TOFF oh! Ben bulo. Gno fi nol rivave nancje a visâsi mieç non, lis clamave simpri
Pardalis, pense tu! Nol capive nuie di paveis

FALÙ Isâl culì, to fi?

TOFF No! Al je lâf vie, cambiade vite, al studiè di dentist

FALÙ Bleah! Jo ai gole di diventâ paveologo

TOFF Paveologo?! Ce ridi

FALÙ Gno pari al dîs cussì, paveologo. Paveiist! o Paveeologjist?

TOFF Paveistalogjie! Paveenomologo!

A ridin di cûr

TOFF Bon! Jo soi Toff, Espert naturalistic!

FALÙ jo mi clami Falù! Cu la efe

Riverencis, salûts

TOFF Falù Cu la efe! Plasê.... ce fâstu culì, picinin

Falù al cjale la pavee

FALÙ Cumò le sveistu? Mi fasarà di mame par une setemane

TOFF Di mame par une setemane? E cui isal il papà, un madrac? Ah ah ah

FALÙ gno pari a l'è tal mâr, al rivarà ca di une setemane, jê mi à dite

TOFF Tu tu sês achì cul papà tal mâr e la mame pavee?!

Falù nol scolte, al cjale dome la pavee, la cjape su, plen di gracie

TOFF ocjo! Ocjo!

Toff al cjale la pavee

TOFF bon, buine, e je sane

po si slontane

TOFF viodistu, di dongje al je facil cjalâlis, ma chês cagnis da l'ostie e scjampin simpri, e
Falù investe, al jere dongje dongje e je no scjampave, ai tabaiave trancuile

Falù intant si indurmidìs cu la pavee in braç. Toff al scomence a predicjâ

TOFF ben po, siôr Falù Cu la efe, jo o voi a cirì lis paveis maladis, âstu gole di vignî cun
me? Mi compagnistu? O rivarin magari ancje a vuarilis! A sarès biel, nomo? Ce
dîstu? Cussì magari al ven ancje chel cjastron di gno fi. Se rivi a cjatalu! Da lis voltis
i gomons a rivin dopo une setemane! Falù, compagninsi, par un pôc. Stin adun. Stami dongje. A
passarà cheste buere, a passarà la gnot, a vignarà cualchidun a iudanus

Toff a si incor. Falù al duâr

TOFF Bon, la domande e je clare: mi compagnistu? prin ca vegni la gnot scure e frede!

Toff al si necuarç di Falù

TOFF Ma cjale tu! Indurmidîts un cun chel altri! O vin di spesseâ! Anin! Scomencin cun te

Toff al sofle vie la polvare de pavee, ca si svee

ROSSE Ce porcarie chel profumo!

TOFF ca mi scusi tant, Marsalis

ROSSE jo soi une mame!

TOFF Sì, sì, Falù mi a dite che par une setemane tu lu tegnîs tu, tant che une mame

Rosse e va dongje di Falù indurmidît

ROSSE I âstu butât il profumo ancje a lui?

TOFF No no no! Si è indurmidît di bessôl, al je strac

ROSSE Sveiti, Marù!

TOFF Si clame Falù, cu la efe

ROSSE come fortune!

TOFF Come fortune... Sint, ta cheste setemane tu tui fâsis di mame, e lui mi fâs di aiutant, ce distu? Anin ator ducj insiemit!

ROSSE une setemane interie? O domandarin ancje a lui. Cumò anin, a ven scûr

TOFF Anin, anin, ma dulà, bisugne cjatà une barcje, un aiût!

Toff al cjape in braç Falù indurmidît, cun Rosse poiade parsore. A si sint la buere rivà. Toff si volte di une bande, di che altre

TOFF ma no soi bon di tornâ indaûr. Spietin, ce vino di fâ, sperin di passâ la gnot!

Toff si plante tal mieç dal palc, in pîs.

L'atôr ur lasse di bessoi tal mieç dal palc, a somein une Pietà ribaltade, un pipin om cal ten un pipin frut in braç e une pavee. Al ven scûr, in cuintrilûs si viodin i pipins in spiete

FIN